



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 6

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7



Manipur Governor-i Kuki tsür ana nem Rs 10 lakh agütsü

Russia-i yimjung ken o jembitsü memolungi mali: Putin



VOL. XX NO. 288 (ADOK 288) DIMAPUR TENTONÜ (MONDAY)

CHITENI (JULY) 31, 2023

₹ 5.00

Bajrang Dal-i Assam lanur nem arms training agütsü

Guwahati, July 30, 2023 (Agencies): Rashtriya Bajrang Dal-i Assam nung lanur 350 nem arms training agütsüogo.

Darrang district kübok Mornoi yimtsüing nung July 24 nungi 30, 2023 tashi sentong ka agidang arms training agütsü.

Iba sentong nung martial arts, weapons, survival skills, quick thinking, politics aser Vedic rituals sayu. Arishi küm 18 aser 30 tsüingda lanurtem dang ideological orientation aser hand-to-hand combat sayu.

Praveen Togadia-i aniba Rashtriya Bajrang Dal ajanga Assam nung lanur 50,000 anikogo ta osang angazüker.

"Bangladesh nungi ozüing alema arurtemi lendong bentsür aruba anema raratsü atema training agütsü" ta Rashtriya Bajrang Dal vice-president Nilav Ritu-i ashi.

Jihadi nung ta temulung melemi bilemertem den raratsü aser renema alitsü atema iba

sentong ayongzüka agi, ta pai ashi.

"Bangladeshi nung ozüing alema Assam nung arua lir. Parnoki asenok amakdang aser raradang asenok renema atatsü atema nisungtem nem training agütsür" ta Nilav-isa ashi.

Iba sentong atema Assam, Uttar Pradesh aser Delhi nungi trainers anir aru. Parnok rongnung retired CRPF officer ka aser retired civil servant ka dena lir.

Iba ama training ya India kübok tesem balala nung agir aser Assam nung Bangladesh nung teimba ser aliba tesemtem nung training sentong talila ayongzüka agitsü ta Rashtriya Bajrang Dal tanishirtemi ashi.

Rashtriya Bajrang Dal-i 2018 nungi Assam nung arms training agüja arur. Tamulpur, Hojai, Dhubri (twice), Nalbari aser Mangaldoi nung training sentong 6 agiogo aser tang tashi nung züingsem 2,400-i training agiogo.

15th NAP (IR) Mahila band-i golden buzzer angu



Dimapur, July 30, 2023 (TYO): India's Got Talent Season 10 nung Nagaland nungi 15th NAP (IR) Mahila band ajanga shilem tajung agiogo aser iba ajanga parnoki golden buzzer angu.

July 29, 2023 aonung Sony nung India's Got Talent Season 10 sayua liasü aser iba nung judge Badshah-i Mahila band nem golden buzzer agütsü.

Nagaland police nungi Mahila band-i 'Rock On!!' nungi 'Sinbad The Sailor' ken tera melenshir atenba ajanga nisungtem jangratemdakja liasü aser judge asemprongi noktaker parnok nem tetushi agütsüogo.

"Kodangsa tetsür kati langka inyaksü lemtedir, lai kechi aginür ibaji matong tashi meranger aser mapa tulu inyakteter. La ya menokdangteter" ta judge Shilpa

Shetty Kundra-i ashi.

"Mezüng atema langka tajung ka angabaji kanga balaka lir. Ni musician ka lir aser ni iba amala ken mezüing atema anganür. Iba ya taküm nung khen atema dang aser tang ajangshiba ama kodanga majangshitsü" ta judge Badshah-ia ashi.

15th NAP (IR) Mahila band züingsemtem: Hav. R Shoyanla (Acoustic), Hav. Tonchingsangla (Bass), Cn. Sophia Kath (Bass, Standby), Cn. Sashitsungla (Lead), Cn. Inaholi (Rhythm), Cn. Wetsolou (Keyboard), Cn. Epfutsutsho-o Akami (Keyboard), Cn. Tolito Shohe (Vocal), NCE Nokmalemla (Vocal), Cn. Sanenla (Drum), L/Nk. Kilemyala (Drum, Standby), Nk. Lanutola (Sound Engineer, Standby) aser ABSI Ng. Saka (Band I/C).

Sorkari Manipur tensa mazüoktet; PM-i süoki ia mebilemer: INDIA



Deobarnü Opposition bloc I.N.D.I.A nungi MP 21-i Imphal nung Manipur Governor Anusuiya Uikey den ajurutepdang agiba noksa angur.

Imphal, July 30, 2023 (Agencies): Sorkari Manipur nung kin o kin rara maziüoktet aser iba jagi ita asem tashi süia arua ta opposition bloc Indian National Developmental Inclusive Alliance (I.N.D.I.A)-i metetdaksü.

Prime Minister Narendra Modi-i iba atema ola madokba aitsür aser Manipur tensa atema mebilemtsür ta opposition-isa ashi.

Opposition MP 21-i Manipur Governor Anusuiya Uikey dangi züluba shidi ka nung "Manipur nung yimjung aser teputep adokdaksütsü atema takoksa ajurua aliba nisungtem rehabilitation aser resettlement tangsa inyaksü akhanger" ta shia lir.

"Tesüiba anogo ishika tsüingda khatapba aser ki rongdoktsüba osangtem ajanga state sorkari tesüiba ita asem tashi tensa maziüokteti aruba sayur" ta parnokisa ashi.

Tesüiba ita asem tashi internet noktanga ajanga olulutem kanga prokshir aser telok balala tsüingda temulung melemtap tali adokdaksür, ta opposition MP temisa ashi.

"Prime Minister-i Manipur tensa atema mebilemtsür. Nisungtem kanga jashir aser kin ajak balala küma lir anungji iba tebilemtsü atema tangsa mapa inyaksü nüngdaker" ta parnokisa Governor dang ashi.

NDPP-i journalist dang osang shitak prokshitsü metetdaksür

Dimapur, July 30, 2023 (TYO): Nationalist Democratic Progressive Party (NDPP)-i media nisungtem osang prokshidang kanga kümdangtsü metetdaksüogo.

Nagaland Chief Minister Neiphiu Rio-i Manipur CM N Biren Singh pusemer ta July 28 osangkakettem nung adokbaji tai aser aibelena adokba osang lir ta NDPP Media & Communication Committee-i sangdong ka nung

"Onoki nü dang teinyaksü mapatem inyaka yimjung bener arutsü mepishir aser iba nung temeten adentsüla. Yimjung bener arutsü atema takoksa ajurua aliba nübortem yaritsüla" ta MP temisa ashi.

"Centre sorkari Manipur nung yimjung bener arutsü aser tensa azüoktsü atema inyaksü atema nai Centre sorkar dang Manipur nung tesüiba anogo 89 tashi law & order mali akümba osang abentsü mepishir" ta MP temisa Governor Uikey dang ashi.

Centre aser state sorkartemi Manipur nung Kuki aser Meitei nung taküm aser kiojentem kümzüka meytet. Iba ya nisung 140 tema asüba (official records nungbo 160), 500 tema yiruba, ki 5,000 tema rongdoktsüba aser nisung 60,000 tashi pei talidak toktsür aotsüsa akümba ajanga sayur, ta opposition MP temisa metetdaksü.

"Onoki Churachandpur, Moirang aser Imphal nung lapoka aliba relief camps semdang aser item nung jenoka alirtem den ajurutepa sensaksem. Onoki parnok nungi osang angashidang telok anaprongi ozüing alema mapa inyaksangshiba atema aoksar aser mepelar" ta parnokisa ashi.

"Relief camps indang tia kanga majung aser tanurtem balaka anepalutsü nüngdaker. Kaketshirtemi parnok tarutsü tia memetet kümogo anungji state

asur Centre sorkartemi kaketshirtem atema temulung agüja mapa inyaksü nüngdaker, ta MP temisa ashi.

"Manipur nung nübortem jashiteper, tetsüba tia nung lir, kangshir aser timtemer saka Modi-i hao ta mali" ta Congress general secretary Jairam Ramesh-i ashi.

"Modi kanga dang maziüing pa indang ola angar aser India nung crore aika nem tashiyim agi par 'Mann ki Baat' angadaksür. Team INDIA nungi MPA 21 teloki Manipur Governor den Manipur ki Baat jembir" ta Ramesh-isa ashi.

Manipur semdangba MP tem rongnung Adhir Ranjan Chowdhury (Congress), Gaurav Gogoi (Congress), Sushmita Dev (TMC), Mahua Maji (JMM), Kanimozhi Karunanidhi (DMK), P P Mohammed Faizal (NCP), Chaudhary Jayant Singh (RLD), Manoj Kumar Jha (RJD), N K Premachandran (RSP) aser T Thirumavalavan (VCK) nung dena lir.

Maneni, Rajiv Ranjan (Lalan) Singh (JD(U)), Aneel Prasad Hegde (JD(U)), Sandosh Kumar (CPI), AA Rahim (CPI(M)), Javed Ali Khan (SP), E T Mohammed Basheer (IUML), Sushil Gupta (AAP), D Ravikumar (VCK), Arvind Sawant (Shiv Sena-UBT) aser Congress nungi Phulo Devi Netam o K Suresh nung iba teshimtet telok nung züingsema lir.

Osangbenertemi CM Rio dang Manipur tensa atema asüingdangdang pai Manipur CM Biren Singh-i ashiba nung adener ta dang langzü.

Anungji osang tai aser aibelena prokshiba ajanga timtem bentsür arur aser iba ya nisung ka tenüing menüksüba mapa lir. CM Rio-i Manipur nung law & order tensa atema aria bilemtsüba indang jembia arur, ta NDPP-isa

ashi. CM Rio-i Manipur nung meimchir temeten anema inyakba aitsüogo aser Centre dang yimjung bener arutsü aser tensa süngjemdaksütsü atema mapa inyakang ta mepishia arur. Paisa takoksa ajuruba nisungtem aser kibongtem asoshi teyari yokogo anungji osang tai prokshiba ajanga pa tenüing menüksüogo ta NDPP sangdong nungsa shia lir.

BJP-i Dr.M.Chuba tenüng asanger



Dr. M. Chuba Ao

Dimapur, Chiteni/July 30 (TYO): BJP National Ketdangpurtem rongnung kümsük tanabuba atema Dr.M.Chuba Ao tadong tir (vice president) shimba osang angazüka kanga pelar aser pa nem tenüngsang agütsür ta BJP Nagaland state aser Mokochung BJP nati metetdaksüogo.

BJP Nagaland nungi M. Chuba Ao ya senior most party karyakarta aser tashi anga anidaker rongnung ka lir. Party tajungba nung aintsü aser renloksü atema pai bendanga agütsür inyakba ajanga kümsük ana tashi national level nung pa

züngshir. National Vice President ama Northeast nungi pa kisüng lir, ta sangdong ajanga ashi.

Nagaland state nungi züngsem tejen nem iba ama maongka agütsüba atema Ato Kilonser Narendra Modi, Union Home Minister Amit Shah, BJP National president JP Nadda aser National general secretary BL Santhosh nunger kübok central leader tem dang pelaba lemsateper.

Maneni Dr. M. Chuba Ao nema tenüngsang agütsür aser tarutsü wadang ajak nung tajungtiba inyaksü imla atar, ta BJP Nagaland state sangdong ajangasa ashi.

BJP National Vice President ama tanaben shimba atema Dr. M. Chuba Ao nem tenüngsang agütsür, ta Mokochung Bharatiya Janata Party sangdong ka ajanga ashi.

Dr. Chuba Ao ya yimten yimsüsür tejen aser Naga nunger indang ambassador ka ama lia aru aser asen India linük atema inyaka aru. Pai nüburtem

asener Party asoshi mapa tajung inyakba yagi Nagaland nung karyakarta teti ajungmesotsü, ta BJP Mokochung district tir, Imolemba Jamir aser secretary T. Bendangyanger Jamir nati sangdong ka nung ashi.

Dr. Chuba Ao ya Nagaland nung karyakarta ka ama yimtenren wadang tenzüker aser Delhi nung aliba National party, BJP nung temaba jenjang ngutetba ya pai meranga inyakba nungi ajangzükba lir, ta ashi.

Dr. Chuba Ao takum aser pa mapa nungi asenoka lesson tem angazüksüla aser maneni nübur tenzüksüla, ta sangdong ajanga ashi.

Dr. Chuba Ao dak tamang katetba asoshi BJP National president, JP Nadda dang BJP Mokochung district ajanga pelaba lemsateper, ta parnoki sangdong nung ashi.

Asen lenir dak tamang kaa iba menden pa nemsaga agütsüba ajanga BJP indang nükjidong 'saab ka saath, saab ka vikas' tejakleni aoba sayur, ta sangdong ajangasa ashi.

Kohima nung World Day against Trafficking in Persons amung



World Day against Trafficking in Persons ya Nagaland Police Headquarters, Kohima nung July 30, 2023 nü munga liasü.

Dimapur, Chiteni/July 30 (TYO): Kohima nung aliba Nagaland Police Headquarters nung July 30, 2023 nü "Reach every victim of trafficking, leave no one behind" omen kübok World Day against Trafficking in Persons munga liasü.

Iba sentong nung Chairperson, Nagaland State Commission for Women, W. Nginyeih Konyak-i iba anogomung indang teratet shia liasü.

Iba anogomung nüngtem nung UN aser Europe nunga sentong balala ayongzuka mungtar, ta lai ashi.

Ambassador Neil Holland indang joint statement ka nung nisung shibelenba ya mapa tamajungtiba rongnung ka lir aser meimchir temeden nung aibelenba, alima nung security, safety aser rule of law nung kongshir, ta shia liasü. Nükjidong balala nung ozüng alema nisung shibelenba, talisa alar ama amshitsü, sexual exploitation aser tashiyim agi mapa tasak inyakdaksütsü asoshi inyaker, ta ashi.

Tetsür, tebur aser tanurtem meyirijang aika item timtem ajurutsüsa lir, talisa tajemzükba jenjang nung alirtem dak tali tenük yoker, ta Konyak-i ashi.

Alima nung mapa tamajung inyakba asadanga nung nisung shibelenba ya tematiba jenjang

asem buba nung lir, aser küm shia alima nung tetsür aser tanur million ana shi shibelenba ayoker, ta lai ashi.

Rara, humanitarian crises, socio-economic tsütsü kasa masüba aser tzü-mopung melenba ajanga alima nung nisung shibelenba ayoktsü jenjang tuluba agütsür. Nagaland nunga küm aika tanur aser tetsürtem densema tajemzükba jenjang nung alirtem iba ama mapa tamajung ajurutsü temelaba kumdaksür, ta lai ashi.

Nagaland nunga tayongzükba balala ajuruba indang lemsatepdang, state telungzük nung nisung shibelenba mesüra 'sex trafficking' atema tetsürtem dak tali tenük yokba indang jemba liasü.

Teinlonglong tetsür aser teburtem lendong nung lir, aser parnok ya sex trafficking aser kisü-jensüba ama mapa tashiyim agi inyakdaksür.

Education, awareness aser temzüng-ozüng shidak amshiba ajanga shibelenba tebilemsü koktettsü atema arogo, kin balala tentet aser state sorkar lungjemer inyaksü kanga tongtipang lir, ta Chairperson, Nagaland State Commission for Women, W. Nginyeih Konyak-i ashi.

Timtem ajurur alirtem nem taneptsü lenmang balala agütsütsü, kumzuka ayutsü aser parnok nem ano lenmang balala agütsütsü nüngdaker, ta laisa ashi.

Iba sentong nung Narola Sophie, IPS, DIGP ajanga ozüng alema shibelener temi tasa balala amshia iba mapa inyakba, iba mapa inyakba tera aser nisung shibelenba aziüktsü merangba nung timtem ajuruba indang lemsatepa liasü.

Nisung meimchir shibelenba ya alima nung tekeratiba ainba mapa tamajung lir, aser Nagaland nunga iba ama tatalokba jenti lir, saka maksü tsüboa ketdangsür nem osang magütsür, ta lai ashi.

Iba sentong nung Renchumi Imti, Programme Manager SARA, aser Lanurenla Imchen, Women Helpline 181 Manager nati Mission Vatsalya aser Mission Shakti indang presentation agüja liasü.

Iba sentong ya Department of Social Welfare, Nagaland State Commission for Women, Nagaland State Social Welfare Board, SHEW Mission Shakti, Mission Vatsalya, aser Nagaland Police lungjemer awareness agütsütsü aser region nung nisung shibelenba aziükba nung tashi itshtitsü nükjidong nung ayongzuka liasü.



Akhoya Senso Telongjem Kohima Tsüngremmong
Sentong

Anogo : 2nd August, 2023 | Mapang : 11ako
Tesentepdak : Main Arena, Naga Heritage Village, Kisama

Sentong Akumdong:

Wt. Anenla T Sato, IAS
Commissioner & Secretary to the Government of Nagaland

Sentong Lenir : **Kr. Toshilila Paul**



SENTONG TARENSEN

- Sarasademsü:
Rev A Chuba Jamir, Pastor KABA
- Pela agizükba :
Wb. Akum Jamir, Tir ASTK
- Keyimeta-a Arr mein tsüngsang :
Tanir Wb. C. Temjen Jamir & Wb. Takoyanger Lkr
- Tayongzükba O :
i. Wb. T Meren Paul, Kimen ASTK
ii. Dimapur Akhoya Senso Telongjem
- Tsüngremmong ken ka :
Dimapur Akhoya Senso Telongjem
- Tsüngremmong Ratet :
Wb. Takowati
- Tsüngremmong ken ka :
Tanir Wt. Temsusongla Imsong & Wt. K. Anungla Lkr
- Sentong Akumdong O :
Wt. Anenla T Sato, IAS
- Melepzüng O :
Wb. Burakum Ao, Tongti zülur, ASTK.

ARR ATSÜTEP (ASTK Vs DAST) | CHIYONGBA MAPANG

METETDAKTSÜR

* Iba benjongmong nung Kohima nung alir Akhoya sensosanger aser anükapang ajak metema arua adentsü pelashishia jaoker.

* Iba sentong aser anogo aoshi sensosanger ajaki sarasadema atadi.

Nagaland Governor-i Naknyulüm benjong salem abener

Dimapur, Chiteni/July 30 (TYO): Chang nunger adianu aser adianutsürtem dangi Naknyulüm benong salem abener, ta Nagaland Governor, La Ganesan ajanga sangdong ka nung ashi.

Temenen madak tajung agi takok anguba temaitsü iba benjong ya amunger. Ibai tammang nungi anitetsü asoshi tamangba yimsü tsütsü sentong

ka liasü. Ibai ano aluruba mapang nung lir, anungji aluruba benjong ka ama amunger, ta pai ashi.

Tembar aser kinungertem tsüngta semet aser achi-ajemtsü lemsatepa tesendaktep yanglushiba benjong ka lir. Iba benjong ajanga nüburtem madak tesunep lidakjang, ta Governor La Ganesan-i ashi.



2nd Battalion, Nagaland Armed Police (NAP) Alichen indang Unit Family Welfare ajanga July 27 & 28, 2023 anogotem nung Higher Secondary School nung tesayurtem asoshi Teachers Orientation Programme ayongzuka liasü. Iba sentong nung shisalen sayur ya District Institute of Educational & Training (DIET) Mokochung nungi Dr. Oditola (Lecturer), Aosenla (Sr. Lecturer), Sungtimanla (Sr. Lecturer), Imlikokla (Lecturer), Supongmanla Jamir (Lecturer) aser Neivikuolie Kuotsu (Lecturer) nungerttem liasü.

America-i nüngshi oset 100 shi asenok nem meyipa agütsüogo: PM



July 30, 2023 nü New Delhi nung BJP National Tir, JP Nadda, Delhi BJP Tir, Virendra Sachdeva, party MP Harsh Vardhan aser party lenirtemi Ato kilonser Narendra Modi-i 'Mann Ki Baat' programme nung jembiba angadang tangokba noksa nung angur.

New Delhi, Chiteni/July 30 (Agencies): Amongnü Ato kilonser, Narendra Modi-i, US-i India nem nüngshi oset 100 dak tema meyipa agütsüogo, ta metetdaksü.

Ita shia radio ajanga linük nübürtem den jembiba sentong 'Mann ki Baat' 103buba nung jembidang Modi-i, "America-i India nem nüngshi oset 100 dak tema India nem meyipa agütsüogo. Item nüngshi senti oset asenok nem meyipa agütsüba atema ni US sorkar dang pelar. 2016 aser 2021 kümtem nunga ni America semdangba mapang nung India nem nüngshi oset aika

meypa agüja liasü," ta metetdaksü.

Linük nung temesepba mozü amshiba tebilemsü onük dak sendakba nung pai, India-i sen crore 12,000 dak tema jenjang temesepba mozü seret lakh 10 dak tema raksaa indokogo, ta ashi.

Paisa linük nung lanurtemi temesepba mozü anema longjemmer raraba atema lanurtem nem tenüngsang agütsü. "Temesepba mozü anema raraba nung lanurtem aikati shilem agiba ngua ajungmesor," ta paisa shisem.

Ato kilonser, Uttar Pradesh nung anogo ka kija nung

süngdong crore atembaji otsü tasen ka lir, aser ibaji ajanga nübürtemi shilem tajung agiba tatishitsü sayur, ta ashi.

Modi-i linük nung 'Meri Maati Mera Desh' campaign tenzüksü, aser linük atema taküm bendanga agütsür tasütait sepaitem nem akhüm agütsütsü, ta metetdaksü.

Iba campaign mapang nung 'Amrti Kalash Yatra' agitsü aser linük tesem ajaklen nungi ali aser süngdong 7,500 shi Delhi tonga bener aotsü, ta paisa metetdaksü.

Maan Ki Baat sentong ya mezüng 2014 küm October 3 nü agia liasü.

2019 nungi 2021 küm tashi nung tetsür lakh 13 shi sama: Centre

New Delhi, July 30 (Agencies): 2019 küm nungi 2021 küm tashi nung (küm 3) linük nung tetsür lakh 13.13 dak tema sama aser tetsür teimtiba samaba state anaji Madhya Pradesh aser West Bengal na nungi lir, ta sorkari metetdaksü.

Union Home Ministry-i ashiba agi, taoba hopta Parliament nung iba data benoka liasü; 2019 küm nungi 2021 küm tsüingda linük nung arrshi küm 18 ser temapur tetsür 10,61,648 sama aser arrshi küm 18 tekübok tetsür 2,51,430 sama.

Iba osang ya National Crime Records Bureau (NCRB)-i bendena liasü.

Madhya Pradesh nung 2019 nungi 2021 küm tashi nung arrshi küm 18 ser temapur tetsür 1,60,180 sama aser arrshi küm 18 tekübok tetsür 38,234 sama, ta Parliament nem

metetdaksü. Kasa mapang nungjisa West Bengal nunga tetsür 1,56,905 aser tetsür chanu 36,606 sama; Maharashtra nunga tetsür 1,78,400 aser tetsür chanu 13,033 sama.

Union Territories rongnung tetsür teimtiba samabaji Delhi nung tetsür 61,054 sama aser tetsür chanu 22,919 sama; Jammu & Kashmir nung tetsür 8,617 aser tetsür chanu 1,148 sama, ta kasa osang ajanga metetdaksü.

Parliament nung sorkarisa, linük tesem ajaklen tetsürtem kümzüka alitsü atema sorkari mera balala agia inyakdar, item rongnung Criminal Law (Amendment), Act, 2013 benokba densema lir, ta metetdaksü.

Iba sülen ano ozüng tesashiba akümtsü atema Criminal Law (Amendment)

Act, 2018 benoka liasü, iba Act kübok arrshi küm 12 tekübok tetsür chanu tashiyim amshia raksatsüba nung aibelenertem nem tasüba temerenshi agütsütsü ozüng densema lir, ta sorkari metetdaksü.

Sorkari Emergency Response Support System tenzükogo aser iba kübok linük tesem ajaklen rongdak atema single internationally recognized number (112) agüja lir.

Tetsürtem kümzüka alitsü atema technology amshia mezüngbuba shilem nung yimti 8- Ahmedabad, Bengaluru, Chennai, Delhi, Hyderabad, Kolkata, Lucknow aser Mumbai nung Safe City Projects tenzükogo, ta sorkari metetdaksü.

2018 küm nung Union home ministry-i cybercrime reporting portal ka tenzük aser kasa küm nungjisa National Database on Sexual Offenders benokogo.



July 30, 2023 nü Sriharikota nung aliba Satish Dhawan Space Centre nungi Indian Space Research Organisation (ISRO) indang PSLV-C56 rocket nung Singapore nung DS-SAR satellite den tanga satellite 6 bener 'space'-i khaketa yokdang tangokba noksa nung angur.



AO SENSO TELONGJEM SHILLONG

SILVER JUBILEE

LUROI (AUGUST)
4 ASER 5 NÜ 2023

Omen : Terenlok Aser Telongjem

Tongti O Jembirtem

Wb. T. Senka Ao | Padma Shree Awardee
Wb. K. Temjen Jamir | Yimozülur, Tir Yimiyim

SENTONG I

Anogo | Luroi (August) 4 Nü, 2023.
Mapang | Nikongdang 5:00 Ako
Sentongnir | Wb. Bendangkokba
Tongti O Jembir | Wb. T. Senka Ao
Padma Shree Awardee

"JUBILEE LAPOK"

Sarasademtsü | Wt. Alemla Jamir
APW, ABAS
Aenjar | Wb. (Dr.) T. Temsününgsang
Tir, ASTS
Salem O | Naga Elders Forum Shillong (5 mins)
Samanir Ola | i) Wb. Aren Imsong (5 mins)
Mezüng ASTS Sanen Luden züngsem
ii) Wb. Imkongsashi (5 mins)
Mezüng ASTS Tongti Zülur
Asür Bilemtetba | Wb. Nakin Jamir
Tongti Zülur, ASTS
Jubilee Otsü Kaket | Wt. Atula Yaren
Saya Tayonger, Jubilee Otsü Kaket Luden
"Temeshi Tsüngrem" | Jubilee Choir
Onük | "Aor Putiren" (30 mins)
Tenüngsang | Rev. P. Muksiar



"MAYONGTSÜ"

SENTONG II

Anogo | Luroi (August) 5 Nü, 2023.
Mapang | Anepdang 10:00 Ako
Sentongnir | Wt. Anungla Bendang
Tongti O Jembir | Wb. K. Temjen Jamir
Yimozülur, Tir Yimiyim

Sarasademtsü | Rev. Dr. Meyu Changkiri
Pastor, ABAS
Salem O | i) Ao Senso Telongjem Welfare,
Guwahati (5 mins)
ii) ARC, Nagaland House (5 mins)

"Ao Senso Telongjem Naroküm"

"Terenlok Aser Telongjem" | Temulung Tembar
Samanir Ola | i) Wb. T. Yanger Pongen (5 mins)
Tesüba Sanen Luden Züngsem, ASTS
ii) Wb. C. Apok Jamir (5 mins)
Mezüng Advisor, ASTS
"Jubilee Mong Amonger" | Jubilee Choir
Onük | "Terenlok Aser Telongjem" (30 mins)
Pangzüng Luden Osang | Wb. Pangerniken Longkümer
Tayonger, Pangzüng Luden
Melepzüng O | Sp. Butesen Ozüküm
Tayonger, Jubilee Asameyang Luden
Mulungnen O | Wb. Kümzüc Kichu
Tatong Tir, ASTS
Tenüngsang | Rev. L. M. Yanger



"AAMPOAAMLA"

SENTONG III

Sobaliba Sütöksünem | Cultural fête |

Anogo | Luroi (August) 5 Nü, 2023.
Mapang | Nikongdang 2:00 Ako
Sentongnir | Sp. (Dr.) Imochujang
Kr. Imesenla

Shilem Agirtem

Tiameren Aier

Tongti Sütöksünemtsür
Aor Yar Tsüngsang
Lotha Telok
Tarnunger Otsü
Khasi Telok
Shillong Watsü Ola
Chakhesang Telok
Aor Sobusolem Saya
Eastern Naga Telok

"JUBILEE SHIBANG"



"SÜNGOJEMTSÜ"

SANGDONGER

Ao Senso Telongjem Shillong, Jubilee mung sentong nung adentsü asoshi akhidang Shillong nunga zünger aser alirtem rongnung, tesem balala nung prokshia alirtem ajak pelashishia jaoker. Iba sentong takok asoshi ajaki sarasademtsütsü mepishir.
Bendang balala nung alirtem ASTS YouTube Channel iba link ajanga sentong nung adentsü jaoker: <https://www.youtube.com/@astshillong/featured>
Jubilee Asameyang Luden
Ao Senso Telongjem Shillong



TIR YIMYIM YIMOBILEM (EDITORIAL)

DIMAPUR TENTONÜ, CHITENI (JULY) 31, 2023

Tanü poksung dang bilemertem

Koba lima nung alirtem südörösüaka shirnoki tanü poksung asoshi dang mebilemi teti asoshi bilema küm pungu, kümer ter, küm metsü, küm tenem aser tarutsü küm noklang ta asoshi bilema inyaker, item jagi tangar kibong aser tangar limatem ajateta aotsü. Tanü takar küma renloka aoba tashitait kintem US, UK aser China limatem ya asenok dang nungi tajungba ali temo aser rongsen aketba limatem nung aliba kija agi masü saka parnok yimteni nübertem nüngdaktem ataloka inyaksü asoshi küm ter nung mesüra metsü nungbo ataloka aotsüba sentong yanglur aser itemji sentong nung aliba ama shitak inyaka aoer. China nungbo People's Republic of China yimteni par lima nung terenlok mapatem inyaksü asoshi küm 100 sentong (100 Year Economic Plan) yanglur. Atangji, India ama lima nunga tetenzük dang nungi küm pungo sentong (5 Year Economic Plan) lir, anungji küm 5 tsungda nungji state shia nung kechi terenlok mapatem atema sen kwi endoktsü ta asadanga inyaker. Ajisüaka, Nagaland-bo tesülenang state aküm nungji, iba ama küm 5 sentong nungji menurung anidaktetba agi tangar memenepba indang state nung lenirtemi jembiba aiben angashir. Ajisüaka, aji kisung agi tanü Nagaland merenloktetter ta ashiba agi tangar mulung koka mejembitettsü. Tanü Nagaland mainba timtem kaji asenok rongnung tuluba nungi shir tilatiba tashi agi tanü poksung dang bilemer. Aji oda, asenoki tarutsü Nagaland atema mebilemi tanü jungra ojang ta bilemba agi kija kibong nungi shir Nagaland nung aliba yimten teloktem ajak yimten tangatetba aser nükjidong mali kümogo. Iba jagi Nagaland nungbo küm pungo nung mesüra ter metsü nung renemtsü aser ataloktsü sentong renemba dena merenemteter aser mataloktetter. Atangji, yangi tanü poksung indang bilembaji anogo shia ayangertem indang ashir masü saka kecha nükjidong aser sentong tajung ka mali ser sütepa aser kutepa asüyonga election nung adokra ojang ta toktepdang indang shiner. Aji oda, tanü senotsü tera ajangzüktetra ojang ta bilema ochimashi inyakbaja tanü poksung bilema inyakba mapa lir. Ano, tanü jungra ojang ta ser center nung kechi government lidir iba denji tenük amur apangteper aobajia kasa tanü poksung bilemba mapa ka asütsü. Aji oda, tanü poksung asoshi dang bilemba agi asenoki inyakba mapatem nung mapang aser rongsen endoka 'research' aser 'scientific survey' mapa meinyaki tapi agidang temzüng ozung yanglur aser mapa tenzüker. Iba jagi tanü lemtetba ozung ka asungbo melenshitsüsa akümer, kechiyong mapeter. Aji 'measuring tape' mamshi ser ki yangluba amai lir. Iba amala mesükba mapa kaji Nagaland Municipal Act yanglur mamshitet agienba mapa ya ka asütsü. Ibaji tanü dang tebok sünggra ojang ta ser anibelem agia kecha meinyak, temeyonga mekürak, kechalenia ayazüka mao ser tangar jilu ajizüka inyakba ajanga atalokba mapa ka asütsü. Kasa mekokmein shisatsü jagi Dimapur nung state stadium merenemtetter, Mokochung nung park tilaka ta merenemtet tejen akümer, Medical college metenzüktet ajokshir, Nagaland nungsa National Highway tilaba yangluteter aser joko Nagaland agi ana kümdi asür. Ashi, tangar amaji asenoka tanü poksung dang mebilemi teti ajak poksunga alitsü asoshi bilema küm ter metsü terenlok sentong yanglur shitak inyak nungbo, tang yabo Nagaland nung electricity tashia agir magima atsüteta agia lila, aluyimba nung chiyongtsü tapu aika züsenteta asenok poksung dang masü tangar bok dena süngdaktsüla. Aji oda, kodang asenoki tanü poksung asoshi mebilemi inyakdir, election-a junga agitettsü, kechi komaka yimten tensa arudir aruaka political party tangatetba nung Naga nung asoshi nokdaktsü. Idangjibo asenok bok dang nungibo Nagaland bok tongtibangba akümstsü aser asen bok asungtsüba dang nungibo pei nübertem bok süngdaktsüstsü asoshi bilema inyaksübjang tongtibang asütsü. Aji oda, kodang pei poksung indang masü saka tarutsü pei nübertem asoshi bilema inyakdir, government melenyonga terenlok sentongbo memelentsü. Idangjiang, pei nübertem ajak tebok sünga tesünep nung pelatepa alitsü.

OLEMSABANG

TSÜNGREM MONG

- I.Shilu Jamir, Naharbari, Dimapur, July 2023

Aoer benjongmong rongnung tulutiba "Tsüngrem mong" ya lir tanü putu lanurtem asoshi-a ya kanga tongtipang ta bilema ajangshiba aser angazükba tongmelang Tsüngrem mong ratet tatsüka lemsateper.

1. Longtrok nung poker Chungliyimti lima aliba putu tensa süng lanu, long lanu, shiruru nisung, Tsüngrem kecha tebandang mali meimchirtem-a shiruru yimya mesüka pei sasep litepba putu mapang aji oda tesüngmangtsu ka lia aruba otsü-i ashir.
 2. Iba tensa yimti nung tainer ana Tsüngremsang aser Merangsang na ajurutepba metetteba tena tembar tajung aküm. Yamaji iba yimya benschia mezüng ajurutep dang junga metetpela yimya tajung tanüa Aoer-i benschir ta jembir.
 3. Iba putu mapang Aoer nübur ajunga yimten yimli maparen benjong bentsü sobaliba, loktiliba kecha maka oda mapa ajunga agi alu yima, inyaka chia jema alitsuba ji dang liasu. Tena tembar yimteper küm na buba tena arr süa alu ayim.
 4. Tsüngremsang dang pongmang nung Teyar-i ashi "Nai alu inyakmaa mapa temer kelen anogo terok anempong among mongjang, ni nai inyakba ajak nung moatsütsü" ta ashiba pai tashi angaa pai terok nü anempong among. Alu meinyakma ayi sakzüka alu wadang temtaka yur hapta piyong par shinga alui maru yimer ajak süngmangteba liasu. Par alu meinyakma yongbo alu arudangbo par tajungba. Longkitsungba teyar-i moaja, tsük tangar ajak dang par tajungba aser teinba ruden. Oda par teyarjagi kanga tsüksung onsünga moatsübjai kenyongi palaka tesüngmangtsüka liasü.
 5. Tanabuba küm Merangsangjia pa tembar Tsüngremsang nungi angazüka 6 nü tashi anga anempong among aser tenaprongla alu nung tsünütsü o tsük ajak junga züsentetba nunga oli nunga aruli ta talubu benden. Joko Merangsangi Tsüngrem mong teti monga tenzüng nung pa ajanga Tsüngrem anempong mong ya tenzüng ta otsü lir.
 6. Ajisaka Merangsang yakta yim toktsür Sangpuyim nung alitsu aotsüsa aküm nung Chungliyimti nungger iba tsungrem mongji memongtet.
 7. Merangsangi Chungliyimti toktsür par adianu den Sangpuyim nung oa alidang pai par yimer dang Tsüngrem Mong amongtsü ashi. Yimeri memulong aser mamong.
 8. Par nüburi memulongi mamong yongbo pa kümji Merangsang aser par kibongibo terok nü anemponga among. Alemlü iba putu mapang shiruru yimya ama kiyong kidanger tsungda-a hai-hau mesütepi litepa aruba putu, anü adoker alu-a memetet pei alu wadang renemtsu dang aritepa tasen lumongba mapang, par alubo ayi sakzüka alu wadang temdaka yur par anemponga mongtep, tesüang oa aluji inyakmaa, saka tsük aser tsünütsü par tajungba adok, aser kanga tsüksung onsünga nunga oli nunga aruli ta ruden aser yimer ajak kanga süngmangtepesa jembitep. Iba sülenbo joko nübur talir ajak ajizüktepa küm shia 6 nü anempong ji mongtepa tanü tashi amonger aser iba dangji Tsüngrem mong ta ajar aser amonger.
 9. Merangsang künü arem min leni arr ateni ao dang Tsüngrem telok ka arr atsütepya longsotepba ajuru "Nenok kechisür" ta pai asüngdang nung "Onok arr atsütepa longsopepa pelatepba Tsüngrem Mong amonger" ta langzü. Iba jiluji ajizüka Tsüngrem Mong nung shizüng zü ateni oa bener adoker yimer ajak longsopepa pelateba arr atsütepa benjonger ta otsü lir.
 10. Iba sülen Sangpu yimer Longsa limai arua lia Tsüngrem Mong junga amongba ajanga yimchi yimjung süa ali. Alemlü Longsa Mong ta jar anogo terok nü jisa among ta otsü jembir.
 11. Yamaji alemlü mapangbo pei pei mongbo mapang apirsa terok nü monga arua liasü. Aji saka kodang Dr. Clark ajanga Yisu yimsü bener arua sayua asen nubur nüji kümdaktsü, iba sülen Mungdang, Arogo, Kaketshir, Yimden longjemer 1944 küm Longjang yimti Ao Kaketshir Mungdang nung anogo asem nü dang amongtsü longjema renemted. Yamaji, idang nungjagi tenzüka August 1-3 tashi asenok-i Tsüngrem Mong monga arur.
 12. Tsüngrem Mong amongba mongpoji tsürabur temi alu laumokbi mapatem tema arudang süngben liben apongba mapang takzür kiolu mapa tempanger joko alu nung repra maparen ajak temer züsenba ajak nungji tejang tajung tangjang aser kanga moajang ni ta külema amongba anogomong lir. Tongtipangsa süngsa/süngsaben apongba mapang agi tet-züa amongji monga aru. Aji oda Tsüngrem mong anogo shiaji tetezü aketba ajunga den pet peta sentong tarensenjia yamaji lemsar monga aküm küta renema inyaka benschia aru.
 13. Tsüngremmong anogotem:-
a. Süngben Mong. b. Zünga Yongya Mong. c. Yati Mong.
- a. Süngben Mong (Mezüngnü): Mezüngnü benjong piyong atema süng, aonsotsü, tachi tajemtsü, sobosolemtsü, yi aser mejemtsütem ajak tetsürtemi renema bendena tep ta anealua ayu. Teburtemia ki sobo teberi teburjunga enoka merükmejua kima tongshi nung Longkitsungba süngsem tou bener arüa alenloka ano Tir kidang süng benokja aser ano nüngdakba bendena merükteta renema yutsür aser itemjagi yamaji anempongera ta meteter.
- Iba sülen süzüngzü akidang mapang lia nungi arem nung ajioka yua alibaji nübur rongnung shiba dak amsü kaodir pa jagi anir shizüng züji ateni aoba sentongji ataka yamai inyaker. Arem minak tiyong nong aliba shizüng züji tajung yaren aketba Tsüngremi ozü yimkong nubur nem moatsügo ni ta ok atena meyua bener pelatepa adoktsü. Yimertem yim among tashi lenji arua kanga pelasete ajuruteper külemi meyua longsopepa shizüng zü tuluji apur yim atongtsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

London nung nisung aikati UK nung revival atema sarasadem



July 29, 2023 nü London nung aliba Trafalgar Square nung Khristan noklang aika adenshia UK nung asentenshi milak atema sarasadem dang tangokba noksa nung angur.

London, July 30, 2023 (Agencies): Honibarnü (July 29, 2023) London nung aliba Trafalgar Square nung Khristan noklang aika adenshia UK nung asentenshi milak atema sarasadem.

Kingdom Impact Vision International (KIVI), London Prayer aser Worship Festival-i senteper ayongzükba sentong nung denominations aser

Arogo balala nungi nisung noklang aika adenshia tekülem sentong agiba den külemi UK nung revival atema sarasadem.

Iba sentong nungji osangtajung kentener, Noel Robison leniba nung tekülem aser tetushi ken atenba den külemi Yganda nungi Neema Choir aser Spanish Community Choir-ia ken tena liasü.

KIVI Ministries-isa UK tesem balala nung jila aika nung item sentong ayongzüka agiogo. Parnoki Margate, Walsall aser Birmingham densema jila aika nung sarasadem sentong agiogo.

August 26 nü London nung Franklin Graham indang evangelistic sentong ka ayongzüka lir aser iba sentong nung KIVI-a adentsü.

Khristantemi Hiroshima aser Nagasaki poksatsüba bilemteta amongtsü

July 30, 2023: World War II mapang atom bomb ajanga Japan nung Hiroshima aser Nagasaki yimti na poksatsüba anogomong bilemteta amongtsü atema alima tesem balala nung nüburtem renemtepba mapang nung UK nung Khristantemia iba anogomong bilemteta amongtsü.

Atom bomb ajanga 1945 küm August 6 nü Hiroshima poksatsüba aser 1945 küm August 9 nü Nagasaki yimti poksatsüba lendong nung nisung meyrjang aika asü aser aika temang lemta-a liasü. Atomb bomb lendong nung jenburtem dang 'Hibakusha' ajar aser parnoki alima nung nuclear bomb mamshitsü atema ayongzüka arudar.

Taküm iba anogomong nung Christian Campaign for Nuclear Disarmament aser Anglican Pacifist Fellowship na

longjemer August 6 aonung online ajanga sentong ka ayongzüka agitsü. Iba sentong nung sarasademtsü, tesüiba mapang bilemtetsü aser ken atentsü.

Kasa sentong nungjisa item lendong nung takoksa angurtem aser lendong nungi jenburtem atema sarasademtsüba den külemi alima nung nuclear hadir mamshitsü atema sarasademtsü.

Kasa sentong nung Coventry nung tongti putir, Rev. Christopher Cocksworth-i o jembitsü.

Christian Campaign for Nuclear Disarmament Co-Chair, Bridget Tiller-i, "Hiroshima bilemteta ya teti agi sentong tajung ka asür. Ukraine nung maneni rara lia aser nuclear hadir amshitsüsa tensa ka nung iba sentong agitsü. Taküm iba sentong agiba ajanga maneni yimjung

atema inyaksü atema asenok ajungmesotsü imlar," ta ashi.

Anglican Pacifist Fellowship Chair, Sue Claydon-i, "Hiroshima aser Nagasaki nung atalokbaji ajaki meteta dang lir, nisung jenti samaba aser kangshiba tatalokbatem asenoki meteta lir. Tongti putir Christopher Cocksworth-i yimjung atema inyakba aser nuclear anema onok pusemba atema pa dang pelar. Iba sentong agiba ajanga aikati meyipa reprandanger tarutsü nung yimjung atema inyaksü imlar," ta metetdaksü.

August 6 aonung 8:00 ako nungi iba sentong tenzüksü.

Iba sentong nung Zoom ajanga adentsü janrartemi angati registration iba linük nung agitetsü- <https://us06web.zoom.us/j/812123456789>



Settsü (Mokokchung), July 30, 2023: Amongnü Narotekong Baptist Fellowship nung Pastor, T. Chuba Jamir leniba NBF-i Settsü nung lushi nung aliba Anava Hospital semdangba mapang tangokba noksa nung angur.

ANOGO ABEN TSÜNGREM DEN

Tsüngremi Mulungba

Efesa 3:8-21

AJAK DANG TALI ASENOKI ASÜNGDANGBA MESÜRA BILEMBA

Tang, asenok dak inyakba ain amato, shibai asenoki asüngdangba aser bilemba ajak dang kanga tali inyaksü akoker ... sentsüwangshi putu ajak nung teti liang. Efesa 3:20-21.

Asenok Khristan tamang aser teimla aser temeim nung tali imlaba nung lendong tila ka lir. Shidakba lendongji kanga ilara imlaba mesüra tai imlaba nung lir. Tanü azüngba Lai jagi asen Tsüngremi inyaksü akokba dang nungi kanga agi tajemba asen sarasadem aser tebilembaji lir ta sayur, kechiaser asenok meimchir dang asünung, asenoki Tsüngrem indang bilemba aser Pa den jembiba meimchir ama dang lir aser telatet ka dang. Asenok koloki Pa ain uluba mesüra asen taküm nung Pa yimli nung aser alima nung Pai mulungba Pa taochi mapa masatangtetter. Missionary William iba ochi o nung ammeter ashi, "Mapa tulu Tsüngrem nungi imlaang".

Tatishitsü agi, Tsüngrem den Khrista ajanga asenok tesendaktep asenoki Pa nungi tera dang alir kechiaser asenoki iba nungi tulu ka meimlar. Ibaji asenoki Pa sentsüwangshi tuluba asoshi mebushir asütsü. Tenla kidang asen tekülem nung aser kibong tekülem nung angutsüba mengui alitsü akok aser Tsüngremi masadangtetba mapa inyaksü akok ta mebileteti tila ka dang asüngdangba asütsü akok.

Aji saka Tsüngremi asenok tatakzük metetta aser Pa O aser Kibuba Benjung nung asenoki sarasadem dang aser Pa indang bilemdang Tanela Temeshi-i agütsütsü nangzük.

Tatem maka Kibuba, Na nungi aruba shisatsü agi onok sangdakjang; Ne tenüng nung onoki sarasademer. Amen.

Ukraine-i Khristmas January 7 nü masü Dec. 25 nü amongtsü

July 30, 2023: Ukraine linüki Khristmas anogo January 7 nü masü saka December 25 nü amongtsü telemtetba agiogo; iba ya Russia tetuyuba anema telemtetba agiba lir.

Ukraine Tir, Volodymyr Zelensky-i, Russia-i Ukraine dang January 7 nü Khristmas amongtsü tuyur, ajisüaka onoki linük ka ama Russia nung sobaliba sendoker, ta metetdaksü.

Ukraine nung Orthodox Khristan ya Russian Orthodox Arogo kübok lir, ibayongji parnoki Khristmas anogomong ya January 7 nung ang amonger, ajisüaka parnoki joko December 25 nung ang Khristmas amongtsü telemtetba agir.

Zelensky-isa, Ukraine nungeri pei maitsü atema kanga meranga inyaker aser Ukraine nung ajaki pei sobaliba beshiner aser sodi anogotem mongner, ta ashi.

Yaküm-a Ukraine nung karibo Russia nung yimsü sobaliba alema December 25 nü Khristmas monga liasü.

Ukraine-isa Ukrainian Statehood Day July 28 nü masü saka July 15 nü amongtsü aser Defenders of Ukraine anogomong Ocotober 14 masü saka October 1 nü amongtsü. Russian Orthodox Church

as er Eastern Orthodox Arogo kari tang tashi akhidang amshiba Julian calendar amshir. Julian calendar nungbo Khristmas anogoji Gregorian calendar nung aliba Khristmas anogo (December 25) sülen anogo 13 lir ang lir (January 7).

Catholic Arogoi mezüing Aso 16buba nungi Gregorian calendar amshia aru. Iba mapang nungjagi tenzüka Protestants aser Orthodox Arogotemi Khristmas aser Easter anogo asadangtsü atema peipei calendar amshir.

Ukraine linük nung Orthodox Khristan telok ana lir; telok ka Russia Arogo kübok lir aser kaji independent Arogo lir.

Taküm küm tetenzüklen Orthodox Church of Ukraine-i parnoki Revised Julian calendar amshitsü, ta metetdakja liasü. Revised asüba calendar nungbo Khristmas anogoji December 25 lir.

Yaküm Orthodox Church of Ukraine lenirtemi December 25 anogo nung Khristmas amongtsü atema tamangertem nem temelaba agiija liasü.

Osang angashiba agi, Ukraine nung Russian Orthodox Church kübok aliba Orthodox Church-ibo maneni January 7 nung ang Khristmas amongtsü nangzükogo.

AO OSHI ANGAZÜKDAK:
TANÜ ANGAZÜKTSÜBA OJANG



Rokasoa

(v) tokolak angüma atuba (lift head by stretching neck)

* Tongti tesemdanger arudang ajaki **rokasoa** reprang.

Roker

(adj) züngdangba tenem ser ter (sixty)

* Nisung arishi küm **roker**sülen ano taküm tasen ka tenzüker.

OLONG PAITEP # 6592

1					2				3
							4		
5		6			7				
8									9
								10	
				11		12			
		13							
14						15			
				16					

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüik asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemasa - 3


OLONG PAITEP # 6591 TELANGZÜBA

TIPIEN :

- 1. Taa, 3. Teküm, 6. Aibelen,
- 7. Aut, 9. Ajizük, 10. Ojala,
- 11. Semer, 13. Sen, 15. Kioktsü,
- 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüksü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.



YIJEMER KA ACCIDENT :

Yijemer ka accident ka ajurua tetsüing anatsülen raksar operation agi.

Doctor :Na mapang tatsükabo walker amshitsüsa asütsüa.

Yijemer :Kobika südir kecha masüa Sir, Johny Walker dang amshiyonga kecha masü südito?

~ Lilir : WhatsApp



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Mizoram nung Myanmar nunger biometric data bendener



Aizawl, July 30, 2023 Myanmar nunger indang (Agencies): February 2021 nung Myanmar mitkartemi sorkar atsüngdokba sülen Myanmar nung 30,000 tema Mizoram nung jenoka lir. Taoba hopta district 11 nung

ajunga nung inyaksü ta pai ashi. Taküm April ita MHA-i Mizoram aser Manipur dang ozüing alema arurtem indang biographic aser biometric details bendentsü tetuyuba agüja liasü. MHA-i state anaprong dang September 30, 2023 tashi nung iba maparen tembangtsü metetdakja liasü. Taoba mapang Mizoram sorkari Myanmar sensotem ajiteta identity cards agütsü. Centre-i Myanmar nunger meyipa yoktsü ashiba ozü sorkari magizük ta Chief Minister Zoramthanga-i ashi. Mizoram-i Myanmar nunger meyipa meykoteter kechiyong onok kasa kin lir aser humanitarian grounds nung parnok jenokdaksü ta Zoramthanga-i ashi.

Moreh nung journalists 8 indang ki rongdoktsüba aitsür

Imphal, July 30, 2023 (Agencies): Manipur kübok Moreh nung journalist 8 indang ki rongdoktsüogo. Parnok ya state dailies aser electronic media houses balalanung inyaktertem lir.

Moreh Tali Lambi nung People's Chronicle correspondent Lairenlakpam Maipak aser S Santipur na ki rongdoktsü. Parnokisa Imphal Free Press correspondent Ashem Lalit, DDK correspondent B Ramchandra Sharma, AIR correspondent Leishangthem Brojendro, ISTV News correspondent Sagolsem Sanjoy, Impact TV correspondent Maibam Inaocha aser Sanaleibak

correspondent Yumnam Mangang nunger ki rongdoktsü. "Sorkari takoksa ajuruba journalists nem tangsa teyari agütsüsüla aser bushisüngdang sür aibelenertem merenshitsu" ta AMWJU aser EGM teloktemi takhangba agütsüogo. "Manipur nung journalists amakba ya press freedom atema lendong tulu lir. Sorkari journalists kümzüka ayutsüla aser parnok temeten kümzüksüla" ta parnokisa ashi.

Manipur Governor-i Kuki tsür ana nem Rs 10 lakh agütsü

Imphal, July 30, 2023 (Agencies): Manipur Governor Anusuiya Uikey-i Honibarnü Churachandpur nung relief camps sema aodang May 4 nü lendong ajurur shia nem Rs 10 lakh agütsütsü metetdaksü.

Manipur Governor Uikey-i tena nem Rs 10 lakh cheque agütsüba den külemi sorkari yaritsü osang metetdaksü. Governor-isa relief camp balala sema senzü aser internally displaced people (IDPs) den ajurutepa sensaksem. Sorkari akokba tashi teyari

agütsütsü aser yimjung bener aruba den nübertem tarutsü atema inyaksü ta laisa metetdaksü. "Manipur nung lanurtemi ozüing alema mapa meinyaksü ayongzüker. Nisung ajak kümzüka ayutsü atema Central forces mapa lemezükja lir" ta Governor Uikey-isa ashi.

Indian Army-i Tenga Valley nung 'Amrit Sarovar' yanglutsü



Itanagar, July 30, 2023 (Agencies): India sorkar indang Mission Amrit Sarovar tejakleni bener oa Indian Army-i West Kameng District Administration den külemi Amrit Sarovar yanglutsüogo.

Arunachal Pradesh kübok Tenga Valley nung alirtem atema iba mapa inyaksü aser iba ya rainwater harvesting den nübertem tashi aittsü atema lir. Indian Army-i local administration den yaritepa

yangluba Sarovar ya Gajraj Corps local formation nung General Officer Commanding ajanga lapoktsü. Iba mapatong nübertem nem bendanga agütsüba sentong nung West Kameng district DC aden.

Russia-i yimjung ken o jembitsü memolungi mali: Putin

St Petersburg, Chiteni/July 30 (Agencies): Ukraine atema yimjung ken o jembitsü memolungi mali, ta Russia Tir Vladimir Putin-i ashi.

St Petersburg nung African lenirtem den senden amenba sülen jembidang pai ashiba agi, Africa aser China nung inyakym nung ajemdaker yimjung asoshi bushitsü.

Saka Ukraine army temi raraba mapang ceasefire malitsü, ta Putin-i ashi.

Pai jembir mapang tatsüka lir Russia-i ashiba agi, Ukraine nung drone kati Moscow amakdang office blocks ana raksatsü. City centre nungi south-west tsütsü Vnukovo Airport nungi mapang tatsüka tayimtsü anena ata aser nisung ka yiru, ta Russia indang state news agencet Tass ajanga ashi.

Ukraine-i tang tashi drone indangbo shia mali.

Yimjung ken o jembiba atema, 'preconditions' kar medeni ken o jembidaki marutsü, ta Ukraine aser Russia nati taoba mapang shia liasü.

Kyiv-i par litsü tilakata magütsütsü ta ashir saka

Moscow-i ashiba agi, Kyiv-i par "territorial reality" tasenba agizüksüla. Russia-i par kidanger taoba küm nungi amak tenzük aser Ukraine south aser east tsütsü litsü-lika rakzük.

Putin-i Honibar aonung osangbener senden ka nung jembidang tang atema Ukraine nung tali amaksü sentong mali ta ashi.

Nisung kar apuba atema pai bukuma jembir aser telunglen nungi nisung kari Russia nem timtem agütsür.

Moscow-i Ukraine amakba aitsüba ya ozüng alema lir aser opposition züngsem tejangja aika pua lir mesüra linük nungi jena ogo.

Russia tirisa osangbener dang ashiba agi, ita tetenzüklen Crimea apu ka nung apokba sülen Moscow-i "preventive strikes" agia liasü.

Iba apu lendong nungya nisung ana asü aser iba sülen Ukraine-i kiralongra mapa inyakba nung telangzüba agütsütsü, ta Putin-i nangzük.

Apu apokba atema Kyiv-i tang tashi nangzük mali, koba Crimea peninsula den sendakteper.

Africa linük tenet nungi lenirtem densema telok kati taoba ita Ukraine Tir Volodymyr Zelensky aser Putin ajuruba sülen Russia-Africa summit ya mena liasü.

Tir Zelensky-i tawa Bakhmut anasa Ukrainian special forces semdanga arur, koba rara tenzük tesashitaba raraba yimitem rongnung ka lir.

Kyiv sepaitem ya tanemtanemi anüdoklen aliba yimti leni otar ta Ukraine ketdangsür temi ashi, koba Russian sepaitemi May ita rakzuka liasü.

Ukraine north-eastern tsütsü Sumy yimti nung aonung tepiyong rockets agi maka nisung ka tepset aser pongu yiru, ta linük indang interior ministry ajanga ashi.

Ministry ajanga Telegram nung ashiba agi, Russian missile kati Honibar nikongdang educational institution ka nung amak.

Ano Honibarnü Ukraine south tsütsü Zaporizhzhia yimti nung missile ka agi kongshia nisung ana tepset aser ka yiru, ta ketdangsür kati ashi.

Thailand fireworks warehouse apokdak nisung ter dak tema asü

Sungai Kolok, Chiteni/July 30 (Agencies): Thailand south tsütsü fireworks warehouse ka poksaba lendong nung nisung 12 asü aser nisung 100 dak tema yiru, ta ketdangsür temi ashi.

Honibarnü Thailand south tsütsü Narathiwat province kübok Sungai Kolok jila nung iba lendong ya iba ki yangluba mapang yinsang rongtepba nungi adok südi, ta provincial governor-i ashi.

"Nisung ter asüba jangjaogo aser mejangjaba nisung tasümgang ana indang DNA tendangtsü yokogo aser nisung 121 yiruba nung ana kangasa mejungi yirua lir," ta Sanan Pongaksorn-i ashi.

"Yangji joko nisung tasüba malitsü," ta Sanan-i ashi.

Narathiwat province indang Public Relations Department ajanga ashiba agi, ki 200 dak tema nung kongshi. Jana telung nung ano

nisung kar nembanga alitsü amai ketdangsür temi bilemer, ta ashi.

Iba lendong atalokba tesem nung tangokba video tem social media nung prokshiba nung ki, gari aser motorbikes aika raksar alidak nungi mokozü tulu adoka liasü aser yimtem tem jana agi sünger liasü. Nisung aliba ki aser ano ki danga aoka kilem mesüra jara tsüker liasü.

Public broadcaster Thai PBS ajanga ashiba agi, Malaysia den arütsü anasa aliba jila nung iba lendong ajanga ki 500 raksatsü.

Lendong atalokba tesem nungi metre 100 pilar alir tenük kuli akar kati ashiba agi, iba ki apokba sülen nüburtem lendong agitepa liasü.

"Ni ki telung nung phone amshia liasü aser ajungbena tsüngmok ama ola tulu ka angashi aser ozü ki

anokshitsü," ta Seksan-i ashi.

"Iba sülen ozü kilem tuluka lapoker aliba ni angu. Ni kimalen reprangzuka yok aser ki lapoba aser nüburtem tesem ajaklen longdaka aliba angu."

Narathiwat police commander, Police Major General Chalernporn Khamkhiew-i ashiba agi, iba lendong ataloktsü mapang tatsüka lia firecrackers bener arua liasü.

"Item firecrackers ya ozüng alema mesüra temelaba makai bener aru asü masü ta onoki bushisüngdang. Firecrackers ayutsü mesüra ayoktsü atema onoki tang tashi licence mangur," ta pai ashi.

"Iba factory ya licence mali dang mesüker." Gunpowder tuozük seret 1,000 shi apokba nungi iba lendong ya adoka ali metre ana tarok aser telungzük metre trok pokteta liasü.

"Onoki iba factory kibur jaokogo, kechiaser parnoki senzuka yutsüba ajanga lendong ya atalok," ta Muno district indang police tekolakba Colonel Suthawet Thareethai-i ashi.

"Onok pa aruba atar," ta pai ashi.

Pakistan nung rally ka nung bomb tesashi ka apok

Islamabad, Chiteni/July 30 (Agencies): Pakistan kübok Afghanistan den arütsü nung aliba Bajur district nung Deobarnü yimden yimsüsür aser Muslim nung lenir ka pusemertemi rally ka ayongzuka agiba mapang bomb tesashi ka apok. Iba lendong nung nisung 39 asü aser nisung 100 dak tema yirua liasü, ta local ketdangsürtemi metetdaksü.

Khar nung mozüki tongtiba indang emergency room tekolakba Azam Khan-i ashiba agi, tasümgang 39 mozükidangi bener aruogo aser tasümgang karbo parnok kinungertemi benerogo. Kasa mapang nung iba lendong nung yirur 100 dak tema jungogo.

Sorkar ketdangsür Mohibullah Khan Yousufzai-ia, iba lendong nung nisung asüba indang osang jangjashitsüogo aser ashiba agi, kanga mejungi yirur alirtem provincial capital, Peshawar-i tayimtsü ajanga

anirogo. Rally nung bomb pokloksüba ya osang agütsüba mapang tashi nung shingai mesangdongi liasü.

Police ketdangsür tejen Nazir Khan-i ashiba agi, Maulana Fazlur Rehman indang Jamiat Ulema-e-Islam party indang workers' convention ya Bajur district yimtiba Khar tezülen agia aliba mapang bomb ya pokdaksü.

Khyber Pakhtunkhwa province indang inspector general of police Akhtar Hayat Gandapur-i ashiba agi, party lenir tejentem tonga maru tsüngda iba bomb poka liasü.

Islamabad nung Al Jazeera indang osangbener Kamal Hyder-i ashiba agi, iba lendong ya pei temang nung bomb alenoker pokdaksürtemi mapa tabo tang tashi mejangjai lir, ajisüaka Tehrik-e Taliban Pakistan (TTP)-i iba bomb pokdaksü asütsü ta temulung melemer bilemer.

Rehman ya pro-Taliban cleric ka ta züngshir aser pai aniba political party ya Islamabad nung teloktep sorkar nung shilem ka lir.

Mulungnen O



Akangenla Imsong (Yaongyimsen)

Onoki teti meima aliba asür Akangenla Imsong shiranga aliba mapang mungi asüpila sentong tempang tashi nung ana aser talang nungi shirmokisa aria bilema yaritepogo, nenok ajak dang onok kinungertemi pelaba lemsateper.

Nenok temeim aser tejungnü mapatem onok mulung zürepa aliba mapang yariba onoki kodanga mamatsü."Tsüngremi nenok kija aser kibongtem ajak moshia mojangma"

- Temeim Kinungertem.

KOTAKER MONGCHEN NUNG KUMASEM RENTETOGO



Wt. M. Tainla Longkumer (Akhoya)
31st July 2020 - 31st July 2023.

Khrista nung asürtem tamasa shia arutsü. 1 Thesa 4: 16.

Onoki teti meima aliba tsürapur Wt. M. Tainla Longkumer, Kibuba kidangi or kum asem tashi sütema oaka, onok mulungjang nung ne temeim, taremsük, shisa tajung, teti bilemteter, ya onoki kodanga amatsu makokba nüktzü.

Akümlir wadang temer, Kibubar kidang anisungzuka, tepela dak "tatem makai alitsü koda tajung. Onok ajaki kanga longraseta bilemer.

"Tetsur aikati temsua inyakogo, saka nai parnok ajak ajatetogo " Apj. 31:29.

-Temeim Kinungbo aser Kinungertem.



IDBI BANK LIMITED
Website: www.idbibank.in

KOHIMA SECRETARIAT, TUENSANG, MON TOWN (NAGALAND) NUNG OFFICE ATEMA KIMONGNÜNGDAKER

Bank-i office amenoktsü asoshi mapang talangka atema 'lease' nüngdaker. Kimong tetemsü alir aser tejangrartemi **anogo 10** tsüngda (advertisement agütsüba anogo maden) **Senior Regional Head** den tongtepretepan. **August 10, 2023 nü nikongdang 6:00** tashi nung aruba proposals ang agizüksü. Telatetbatem aser osang tejangja onok indang website: **www.idbi.com** nung **Notice-Tenders** ajanga download sütettsü mesüra onok indang branches mashie ka nungi agizüksü akok.

Name of Location	District	State
Kohima Secretariat	Kohima	Nagaland
Tuensang	Tuensang	Nagaland
Mon Town	Mon	Nagaland

Kolkata
31.07.2023
Sd/- Chief General Manager
Kolkata Zone

METETDAKTSÜR

Soyim Standard School, Yaongyimsen village Silver Jubilee atema Raffle Draw ka 01 August 2023 anogo nung sayatsü alibaji 15th. December 2023 anogo nü sayatsü atsülanger.

Teyaritepertem ajaki aremsüka iba anogo ataa lidaktsüner.

Yimtiba Khar tezülen agia aliba mapang

World Cup: Norway-i goal 6-0 agi Philippines kokogo



Chiteni/July 30, 2023 (Agencies): Deobarnü tetsür World Cup asaya nung Sophie Roman Haug-i hat-trick ka idakja Norway team goal difference nung knockout stage tongtetogo. Parnoki Eden Park Philippines team goal 6-0 agi koka liasü.

Winger Caroline Graham Hansen aser Guro Reiten natia iba asaya nung goal idakja parnok Group A nung co-hosts New Zealand jakdang tanabuba jenjang nung tembangogo.

Philippines team, shirnoki New Zealand team kokogo, parnok par telok nung pongla nung tembang liasü. Iba asaya nung defender Sofia Harrison-i, Thea Bjelde dak foul menaba sülen la nem minute 67buba nung red card agütsü aser

Philippines team asayar 10 agi dang asaya tembang liasü.

Asaya nung mezüngbuba goal ya minute 6buba nung right back Bjelde-i agütsüba ball ka Roman Haug-i aibelen mesüi idakja liasü.

Iba sülem Minute 17buba nung ano midfielder Vilde Boe Risa-i agütsüba ball ka Roman Haug-isa tongokja tanabuba goal idaktsü.

Asaya mezüngbuba shilem nung ano minute 31buba nung Graham Hansen-i Philippines goalkeeper Olivia McDaniel adena ball kanga kanga junga metsüokja lar team asoshi tasembuba goal idaktsü.

Philippines team asoshi jenjang mejungi aliba ano tamajungba kümshidakja fullback Alicia Barker-i asaya tanabuba shilem tenzüker

minuter asembuba nung lar goal nung ball ka idaktsü aser iba sülen minute pongu dang lir Reiten-i penalty ka ayong ayonga idakja liasü.

Maneni asaya tanabuba shilem nung mapang apuloktsür asayaba mapang Reiten-i agütsüba ball ka ano Roman Haug-isa idakja lar team asoshi goal trokbuba aser la asoshi goal tasembuba idakja liasü.

Iba asaya akokba sülen Norway team Group A nung Switzerland sülen tanabuba jenjang nung tembangogo aser parnok last 16 nung Japan mesüra Spain den asayatsü.

Deobarnüsa Group A nung Switzerland aser New Zealand na asaya goal kaka danga magütsüteti asaya tembangba sülen New Zealand team tsükogo.

Durand Cup Brehostibarnü tenzüksü: CM Mamata-i shilem agitsü

Chiteni/July 30, 2023 (Agencies): 2023 Durand Cup, Kolkata kübok Vivekananda Yuba Bharati Krirangan (VYBK) nung August 3 nü tenzüksü aser mezüngbuba Group A asaya ya Bangladesh Army Football Team (BAFT) aser Indian Super League (ISL) tesüsabuba koker aliba team, Mohun Bagan Super Giant (MBSG) na asayatsü.



Asayamung lapokba sentong nung West Bengal, Chief Minister Mamata Banerjee tongti tesemdang asütsü. Gen. Manoj Pande, PVSM AVSM VSM ADC, Chief of Army Staff (COAS), Aroop Biswas, Minister in Charge for Youth Services & Sports, Housing and Power, Government of West Bengal aser Lt. Gen. Rana Pratap Kalita, PVSM, UYSM, AVSM, SM, VSM, General Officer Commanding-in-Chief, Eastern Command nungeria iba sentong nung shilem agitsü.

Kasa mapang nung Local Organising Committee-i, mezüngbuba asaya atema ticket angati agütsütsü telemtetba agiogo aser ticket ya July 31 nü nungi tenzüka anepdang 11 ako nungi nikongtsütsü 6 ako tashi nung Mohun Bagan club tent nung angutsü.

Asayamung lapokba sentong nung shilem ka ama ghonda tesadang ka sobaliba sentong ka agitsü. Sentongtem

rongnung sobaliba saisapong balala sayatsü kong Kerala indang Kalaripayattu aser Punjab indang Gatka nung densema alitsü. Sobaliba sentong tembangba sülen Chief Minister aser tanga tongti tesemdangertemi mezüngbuba asaya nung asayatsü aliba asayartem den ajuruteptsü.

Durand Cup ya Asia nung asayamung ajak rongnung tejentiba lir aser iba asayamung ya August 3 nungi tenzüka September 3 tashi Kolkata, Guwahati, aser Kokrajhar nung asayatsü.

Durand Cup puti otsü nung taküm mezüngbuba team 24-i shilem agitsü. Team tem ya telok trok küma lemsar lir aser telok shia team pezüzü alitsü. Asayamung nung India nung club 19 aser India, Nepal, aser Bangladesh nungi armed forces team pongui shilem agitsü. Telok trok prongla nungi temaba jenjang nung tembangba team tem aser tanabuba jenjang nung tembangba team tajungtiba ana knockout stage-i aitsü.

Sept 20 nungi tenzüka Mokokchung District Football Association (MDFA) Trophy asayatsü



MDFA Trophy 2023 dak sentakba nung osangbener senden amendang tangokba noksa nung angur. Mokokchung, 30th July, 2023.

Mokokchung, Chiteni/July 30 (TYO): "Empower through football" omen dak rangloker Sept 20, 2023 nungi tenzüka Mokokchung Imkongmeren Sports Complex nung 'MDFA Trophy' asayatsü telemtetba agiogo, ta July 30 nü Mokokchung District Football

Association ketdangsurtemi osangbener senden ka nung metetdaksü.

'MDFA Trophy' tenzüka sentongjibo Sept 19, 2023 nü agitsü aser iba anogojibo match kata masayatsü saka kentenmenü aser wawamenü dang teimba alitsü aser iba

Ano osang tajung kaji tanga district nungi arur telok atemabo tamungdak (lodging) angati MDFA-i anepalutsütsü. Taküm October ita Tuensang nung Dr. T. Ao Tournament asayatsüba lir, anungji, Mokokchung tenüng nung asayatsüpurjia tang asayatsü aliba MDFA trophy

sentong nung nungi dang shimtetsü, ta paisa Nagaland nungi nungtugu musician-tem jaoktsü tebilemba lir, ta taküm MDFA Trophy organizing committee, Convenor, O. Wati Jamir-i metetdaksü.

Taküm jangratemtsü aser tanga mapang meinyakdangba kaji, takümbo iba asayamung ya Nagaland Open asayatsü lapoktsür, tetezü Nagaland nung aliba telok mashi kati arua shilem agitettsü koka lir, aji oda, bendang balala nungi asayartem anir arua asayatetsü, ta Convenor-isa ashi.

Taküm iba asayamung shir teloki bendir takoker (champion) nem trophy aser medal den senpet sen 2 lakh, atongdakba (runner up) nem 1 lakh agütsütsü, aser semi final tashi tongteter nema 25,000/- (each) agütsütsü. Iba den ano nija senpet (individual prize) kar shima parnok nema senpettsütsü, ta tayongertemisa metetdaksü.

Iba trophy nung shilem agitsü jangrartemi August 10, 2023 nungi 3 Kit Photo Studio Mokokchung nung form agizükettetsü aser online nungia form ji agizükettetsüsa maparen kar inyaktsü. Form meyiptsütsüba tatembangbuba anogoji August 30 asütsü.

Asayamung nung shilem agitsüpur telok shia nung zülüokba taah (registration fee)

5000/- alitsü, MDFA kübok club tasen züngokba taah 2000/- & renewal taah 1000/- asütsü, aser fixture ji Sept 15, 2023 nü asayatsü, ta parnokisa metetdaksü. Asayamung dak sentakba nung kari danga osang tejangjaba metetnüra mobile number - 8787535824 (MDFA Secretary) den tongteprateptetsü.

Mokokchung District Football Association ya 1992 küm football asaya tsütsü lanurtem ajungshia anitentsü aser parnok nem sabang lapoktsütsü nükjidong nung tenzüker. Yamaji MDFA tenzüker arudang football asayar tajung aika adokogo aser ano maneni adokdaki. Taküm iba asayamung open asayadaksütsü lemtetba ya tongtibangsa Naga nung rangben ajangzükdaksütsü MDFA nükjidong lir.

Asayamung nung shilem agitsüpur telok shia nung zülüokba taah (registration fee)

Asayamung nung shilem agitsüpur telok shia nung zülüokba taah (registration fee)

BILEMDANGANG
"Nai kechi inyakteter aji bendanga agüja inyakang."